



Vschinauncha da S-chanf
7525 S-chanf



Engadin

Da la suprastanza cumünela: tschanteda dals 8 schner 2020

Protocol dals 18 december 2019

La suprastanza cumünela piglia cugnuschentscha dal protocol ed as muossa surpraisa da tschertas formulaziuns aint il protocol scu eir aint il riassunt dal protocol publicho sün l'internet.

Orientaziun davart la surdeda d'uffizi da la suprastanza veglia

Riet Rudolf Campell e Heinz Thomas haun gieu als 30 december 2019 üna tschanteda cun l'anteriur president cumünel Gian Fadri Largiadèr ed haun survgnieu differentas actas da progets pendants. Impü sun els gniesu infurmos cha la chanzlia es occupeda a partir da schner be pü cun 20% pensum (fin uossa 220%) e cha las plazzas dal chanzlist e dal contabel nu sun pel mumaint occupedas.

Ün'impiegheda da la firma Curia Treuhand AG lavura fin la fin da favrer 2 dis l'eivna in büro da contabiled. Tenor ella nun es però pussibel da metter in uorden la contabiled infra quist temp. La contabiled as rechatta pel mumaint in ün stedi preoccupand.

Constituziun suprastanza cumünela, tscherna delegios e nominas pel trienni 20 – 22

La suprastanza cumünela as constituescha pel trienni dals 1. schner 2020 fin als 31 december 2022 tenor publicaziun separeda (ufficiants cumünels pel trienni 2020-2022).

Abitants ed abitantas chi s'interessan da fer part u collavurer in üna cumischiun as paun annunzcher tar la chanzlia fin la fin da favrer 2020.

Agir davart plazzas vacantas persunel

La suprastanza es perincletta cha pel mumaint surpiglia il president cumünel il post scu schef da persunel. Las plazzas dal chanzlist e dal contabel nu sun pel mumaint occupedas. Scu secretarias da la chanzlia sun impieghedas Mireille Thom e Monica Schöpf. Il post da silvicultur ad interim es gnieu surdo a Riet Denoth. Duos magistras haun desdit lur plazzas da lavur per la fin da l'an da scoula, que però independentamaing da la situaziun actuela in vschinauncha. Las plazzas vegnan publichedas. La suprastanza decida cha las uras d'avertüra dal fnestrigl nu velan per la chanzlia ed il büro da fabrica. Quels fnestrigls sun be auncha avierts tenor curvegna.

Infurmaziun a las medias

Ils commembers da la nouva suprastanza cumünela sun gniesu orientos als 11 december 2019 davart ils resultats da l'examinaziun administrativa interna. La suprastanza cumünela decida unanimamaing da surder il cas da la vschinauncha da S-chanf a la procura publica e da collavurer plainamaing cun las instanzas chi examineschan il cas. La comunicaziun da pressa ufficiela cun la decisiun da la suprastanza es gnida publichedada als 9 schner 2020.

Dumanda Curdin Joos per ün permiss d'ustaria per l'Alp Griatschouls

La suprastanza cumünela conceda a Curdin Joos ün permiss d'ustaria limito per l'Alp Griatschouls. Que cun la cundiziun cha vain installada üna tualetta adatteda a la gestiun.

Dumandas da sustegn

La societad Pro Bike Event dumanda per üna contribuziun pel «19avel Nationalpark Bike-Marathon». La suprastanza cumünela decida da sustegner quista dumanda scu fin uossa cun üna contribuziun da frs 5'000.00 scu eir cun frs 2'000.00 pels premis sül Pass Chaschauna. Impü metta la vschinauncha a disposiziun l'agüd analog als ans passos. L'organisatur da l'event ho da pisserer per ün bun alluntanamaint da las immundizchas.

Glista da termins per l'an 2020

La chanzlia ho preparò üna proposta da termins per l'an 2020. Quista dess gnir adattada successivmaing. La prosma tschanteda da la suprastanza cumünela ho lö marculdi, ils 22 schner 2020.

Invids a differents arrandschamaints

La suprastanza decida cha'l president dess decider a che arrandschamaints d'utrò ch'el piglia part sves e cura cha fo segn cha'l depüto dal decasteri piglia part. Impustüt dess il president piglier part a las tschantedas externas da rapreschantaziun.

S-chanf, ils 14 schner 2020

La suprastanza cumünela